

ВО ПЯТНИЦА 6-Й СЕДМИЦЫ ПО ПАСХЕ

В ЧЕТВЕРТОК ВЕЧЕРА ВОЗНЕСЕНИЯ

Кафисмы не глаголем: аще ли где всенощное не бысть,
кафисму глаголем рядовую.

На Господи воззвах: поставим стихов 6: и поем стихиры самогласны праздника 3. И Миней 3.

Праздника, глас 1-й:

Возшед на небеса, отонудуже и сошел еси, не остави нас сирых Господи: да придет Твой Дух, нося мир миру, покажи сыновом человеческим дела силы Твоея, Господи Человеколюбче.

Возшел еси Христе к Безначальному Отцу Твоему, неописанных Его недр не разлучивыйся, и прилог силы хваления трисвятаго не прияша, но единого Сына и по вочеловечении познаша Тя Господи, Единородна Отцу: во множестве щедрот Твоих помилуй нас.

Ангели Твои Господи, апостолом глаголаху: мужие галилейстии, что стоите, зряще на небо? Сей есть Христос Бог, Вознесыйся от вас на небо, той придет паки, имже образом видесте Его идуща на небо: послужите Ему в преподобии и правде.

Слава: святаго, аще имать, аще же ни:

Слава, и ныне: глас 2-й:

Родился еси яко Сам восхотел еси, явился еси яко Сам изволил еси: пострадал еси плотию Боже наш, из мертвых воскрес еси поправ смерть: Вознеслся еси во славе, всяческая исполняяй, и послал еси нам Духа Божественнаго, еже воспевати и славити Твое Божество.

Вход. Свете тихий:

Прокимен великий, глас 7: Бог наш на небеси и на земли, * вся елика восхоте сотвори.

Стих: Во исходе Израилеве от Египта, дому Иаковля:

Стих: Море виде и побеже, Иордан возвратися вспять.

Стих: Что ти есть море, яко побегло еси? И тебе Иордане, яко возвратился еси вспять?

И паки: Бог наш на небеси и на земли:

Ектении: Рцем вси: и Исполним вечернюю молитву нашу:

На стиховне стихиры, глас 2-й:

Подобен: Егда от древа:

Глаголет Иже всяческая Исполняяй, ко учеником на гору Елеонскую возпел: приближися, о друзи Мои, восхождения время, шедше научите языки слову, еже слышасте от гласа Моего. Тогда Вознесся еси во славе якоже на колеснице: темже трепетом апостоли ужасашуся.

Стих: **В**си языцы восплещите руками, воскликните Богу гласом радования.

Егда Матери со ученики спутешествующим друг другу в Вифанию Христе, Вознесл еси руце Твои, во благословение их, и вегда благословити их, облак света от очес их абие взят Тя: тогда Вознесся еси во славе, и Десноседатель воистинну явился еси Отцу спокланяемь.

Стих: **В**зыде Бог в воскликновении, Господь во гласе трубне.

Приидите, совзыдем вернии на высокую гору Елеонскую, якоже апостоли совосходяще, и на высоту вземше сердца, и мысли, узрим Господа ныне носима. Темже и мы благодарно радующеся возопиим: слава Вознесению Твоему Многомилостиве.

Слава и ныне: глас 6-й:

На горах святых зряще Твое Вознесение Христе, Сияние славы Отчи, воспеваем Твой светообразный лица зрак, кланяемся Страстем Твоим, почитаем Воскресение, славное Вознесение славяще: помилуй нас.

Ныне отпускаеши: **Т**рисвятое. **По О**тче наш.

Отпустительный тропарь, глас 4-й:

Вознесся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира.

[Слава: святого, аще имать. И ныне: празднику]

И отпуст.

В ПЯТОК ВОЗНЕСЕНИЯ НА УТРЕНИ

На **Бог** Господь: тропарь праздника, глас 4-й:

Вознеслся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира. [Дважды.]

[Слава: святаго, аще имать. И ныне: празднику]

По 1-м стихословии седален, глас 8-й:

Подобен: Повеленное тайно:

На гору возшед Елеонскую Милостиве Иисусе, оттуду взялся еси: светлый бо облак от земли Тя подъят, зрящим учеником Твоим чудо страшное, вопиющим безплотным на небесех вышшим воинством: страхом врата возмיתся. С нимиже Царя Тя поет вся тварь, всех Бога.

Слава, и ныне: тойже.

По 2-м стихословии седален, глас 8-й:

Подобен: Премудрости Слова:

Всед на облаки небесныя, оставив мир сущим на земли, возшел и сел еси одесную Отца, яко Единосущен Сему сый и Духу: аще бо и в плоти явился еси, но непреложен пребыл еси. Темже чаеши совершения конец, судити Грядый на землю миру всему. Правосуде Господи, пощади души наша, прегрешений оставление даруя, яко Бог милостив, рабом Твоим.

Слава, и ныне: тойже.

И псалом 50. Канон праздника, ирмос по дважды: тропари на 6, един по единому пременяя на всяк день: и минеи на 4.

Песнь 1. глас 5-й:

Ирмос: Спасителю Богу * в мори люди немокрыми ногами наставлявшему, * и фараона со всевоинством потопльшему, * Тому Единому поим: * яко прославися.

Воспоим вси людие, на рамах херувимских Вознесшуся со славою Христу, и спосадившему нас одесную Отца, песнь победную: яко прославися.

Ходатая Богу и человеком Христа, лица ангельстии видевшие с плотию в вышних удивляхуся, согласно же воспеваху песнь победную: яко прославися.

Явльшемуся Богу на горе Синайстей, и закон давшему боговидцу Моисею, от горы Елеонския Вознесшемуся плотию, Тому вси воспоем: яко прославися.

Богородичен: Пречистая Мати Божия, Воплощенного от Тебе, и от недр Родителя неотступльшаго Бога непрестанно моли, от всякаго обстояния спасти, яже созда.

И минеи на 4.

Katavasia: Спасителю Богу ...,

Песнь 3.

Ирмос: Силою Креста Твоего Христе, * утверди мое помышление, * во еже пети и славить * спасительное Твое Вознесение.

Возшел еси Жизнодавче Христе ко Отцу, и Вознесл род наш Человеколюбче, неизреченным благоутробием Твоим.

Чини ангельстии Спасе, человеческое естество видевше совосходящее Тебе, непрестанно удивляеми воспеваху Тя.

Ужасахуся ангельстии лица Христе, зряще Тя с телесем Вознесшася, и воспеваху святое Твое Вознесение.

Естество человеческое Христе, тлением падшее возставил еси, и восходом Твоим Вознесл еси, и с Собою нас прославил еси.

Богородичен: Моли непрестанно Чистая, Произшедшаго от ложесн Твоих, избавитися прелести диаволи, поющим Тя Матерь Божию.

И минеи на 4.

Katavasia: Силою Креста Твоего Христе ...,

Кондак святого минеи, и икос, и седален его.

Слава, и ныне: Седален, глас 8-й:

Подобен: Премудрости:

Всед на облаки небесныя, оставив мир сущым на земли, возшел и сел еси одесную Отца, яко Единосущен Сему сый и Духу. Аще бо и во плоти явился еси, но непреложен пребыл еси: темже чаеши совершения конец, судити грядый на землю миру всему. Правосуде Господи, пощади души наша, прегрешений оставление даруя, яко Бог милостив, рабом Твоим.

Песнь 4.

Ирмос: Услышах слух силы Креста, * яко рай отверзся им, * и возопих: * слава силе Твоей Господи.

Вознеслся еси во славе, ангелов Царю, Утешителя нам от Отца послав. Темже вопием: слава Христе Вознесению Твоему.

Яко взыде Спас ко Отцу с плотию, удивившася ангельская воинства, и возопиша: слава Христе Вознесению Твоему.

Ангельския силы горнейшим вопияху: врата возмите, Христу нашему Царю, Егоже воспеваем вкупе со Отцем и Духом.

Богородичен: Дева роди, и матерняя не позна: но Мати убо есть, Девою же пребысть, Юже воспевающе, радуйся Богородице, взываем.

И минеи на 4.

Katavasia: Услышах слух силы Креста ...,

Песнь 5.

Ирмос: Утреннююще вопием Ти * Господи, спаси ны: * Ты бо еси Бог наш, * разве бо Тебе иного не знаем.

Исполнив веселия всяческая Милостиве, к горним силам с плотию пришел еси.

Ангельския силы вземлема Тебе видевшие врата, взываху, Царю нашему, возмите.

Апостоли видевшие возвышаема Спаса, с трепетом взываху Царю нашему: слава Тебе.

Богородичен: Деву по рождестве поем Тя Богородице, Ты бо Бога Слова плотию миру родила еси.

И минеи на 4.

Katavasia: Утреннююще вопием Ти ...,

Песнь 6.

Ирмос: Обыде мя бездна, * гроб мне кит бысть, * аз же возопих к Тебе Человеколюбцу, * и спасе мя десница Твоя Господи.

Взыграшася апостоли, зряще на высоту днесь Зиждителя вземлема, упованием Духа, и страхом зовяху: слава восходу Твоему.

Предсташа ангели, вопиюще Христе учеником Твоим: имже образом видесте Христа восходяща с плотию, паки приидет Праведный всех Судия.

Яко видеша Тя Спасе наш небесныя силы, на высоту вземлема с телом, взываху, глаголюще: велико Владыко, человеколюбие Твое.

Богородичен: Купину Тя неопалимую, и гору, и лествицу одушевленную, и дверь небесную достойно славим Марие славная, православных похвало.

И минеи на 4.

Katavasia: Обыде мя бездна ...,

Кондак самогласен, глас 6-й:

Еже о нас исполнив смотрение, * и яже на земли соединив Небесным, * Вознеслся еси во славе Христе Боже наш, * никакоже отлучаяся, но пребывая неотступный, * и вопия любящим Тя: * Аз есмь с вами, и никтоже на вы.

Икос: Яже земли на земли оставившии, яже пепельная персти уступающии, приидите воспрянем, и на высоту возведем очи и мысли, вперим виды, вкупе чувства, на небесная врата смертнии, нещцуим быти в Масличной горе, и взирати на Избавляющаго на облацех носима. Отонуду бо Господь на небеса востече, и тамо даролюбезны дары раздая апостолом Своим, утешив я яко Отец, и утвердив я, наставив яко сынов, и рече к ним: не разлучаюся вас, Аз есмь с вами, и никтоже на вы.

Песнь 7.

Ирмос: В печи огненной * песнословцы * спасый отроки, * благословен Бог отец наших.

На облацех света Вознесыйся, и спасый мир, благословен Бог отец наших.

На раму Спасе, заблуждашее взял естество, вознесся, Богу и Отцу привел еси.

Возшедый во плоти к безплотному Отцу, благословен Бог отец наших.

Умерщвленное наше грехом естество взял, Твоему свойственному Отцу Спасе привел еси.

Богородичен: От Девы родился, Юже Богородицу соделал еси, благословен Бог отец наших.

И минеи на 4.

Katavasia: В печи огненной ...,

Песнь 8.

Ирмос: Из Отца прежде век рожденного Сына, и Бога, * и в последняя лета воплощенного от Девы Матере, * священницы пойте, * людие превозносите во вся веки.

Во двою существу возлетевшаго Жизнодавца Христа на небеса со славою, и Отцу соседящаго, священницы пойте, людие превозносите во вся веки.

От работы идольския тварь избавившаго, и представившаго ту свободну Твоему Отцу, Тебе Спасе поем, и Тебе превозносим во вся веки.

Своим схождением низложившаго супостата, и Своим возшествием Вознесшаго человеки, священницы пойте, людие превозносите во вся веки.

Богородичен: Херувимов превышшая явилася еси Богородице Чистая, во чреве Твоем сими Носимаго носившая: Егоже со безплотными, человецы славословим во вся веки.

И минеи на 4.

Katavasia: Из Отца прежде век ...,

Песнь 9.

Ирмос: Тя паче ума и словесе Матерь Божию, * в лето Безлетнаго * неизреченно рождшую * вернии единомудренно величаем.

Тебе Избавителя мира Христа Бога, апостоли видяще Божественно возвышаема, со страхом играюще величаху.

Твою обожившуюся плоть зряще Христе, на высоте ангели, друг ко другу глаголаху: воистинну Сей есть Бог наш.

Тебе безплотных чинове Христе Боже, на облацех вземлема видяще, взываху: славы Царю врата возмите.

Тебе сошедшаго даже до последних земли, и человека спасшаго, и восхождением Твоим возвысившаго, Сего величаем.

Богородичен: Радуйся Богородице Мати Христа Бога: Егоже родила еси, днесь от земли возносима со апостолами зрящи, возвеличала еси.

И минеи на 4.

Katavasia: Тя паче ума ...,

Ексапостиларий самогласен:

Учеником зрящим Тя, вознесся еси Христе ко Отцу соседя, ангели предтекуще зовяху: возмите врата, возмите, Царь бо възде к начальному Свету славы.

Слава: святаго, аще есть: аще ли ни,

Слава, и ныне: праздника

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры праздника, глас 2-й:

Подобен: Доме Евфрафов:

Чудо новолепное, * человеческое бо естество * на небеса възде, * соединившееся Слову Богу * Вседержителю.

Стих: Все языцы восплещете руками, воскликните Богу гласом радования.

Возсия ясный и всесветлый * день Владыки, * Божественного на небеса * восхождения, просвещающий * всяческая.

Стих: Възде Бог в воскликновении, Господь во гласе трубне.

Якоже учеником * послал еси * с высоты Срасленаго * Твоего Духа: и людем Твоим * послал Христе Спасе благодать Твою.

Слава, и ныне: глас 5-й:

Господи, вземлющу ти ся отонудуже не разлучился еси, воинства ангелов и всех безплотных, радостию вопияху горным силам: возмите врата князи ваша, и внидет Царь Славы: престол бо херувимский взят Тя с плотию, Господи слава Тебе.

Таже, Благо есть исповедатися Господеви

Трисвятое. И по Отче наш:

Тропарь праздника, глас 4-й:

Вознесся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира.

Таже ектения: Помилуй нас Боже: Час 1. И отпуст.

НА ЛИТУРГИИ

Блаженна от канона праздника, песнь 1-я, со ирмосом на 6.

Спасителю Богу в мори люди немокрыми ногами наставльшему, и фараона со всеоинством потопльшему, Тому Единому поим: яко прославися.

Воспоим вси людие, на рамах херувимских Вознесшуся со славою Христу, и спосадившему нас одесную Отца, песнь победную: яко прославися.

Ходатая Богу и человеком Христа, лица ангельстии видевше с плотию в вышних удивляхуся, согласно же воспеваху песнь победную: яко прославися.

Явльшемуся Богу на горе Синайстей, и закон давшему боговидцу Моисею, от горы Елеонския Вознесшемуся плотию, Тому вси воспоим: яко прославися.

Слава: **С**остаревшийся, Господи, мир многими грехми, обновив страстию Твоею и востанием Твоим, возшел еси носимъ облаком к пренебесным: слава славе Твоей.

И ныне: Богородичен: **В**ладыку родила еси всех, всенепорочная Владычице, страсть вольную приимшаго, и возшедша к Своему Отцу, Егоже не остави, аще и плоть взят.

По входе тропарь праздника, глас 4-й:

Вознеслся еси во славе Христе Боже наш, * радость сотворивый учеником * обетованием Святаго Духа, * извещенным им бывшим благословением, * яко Ты еси Сын Божий, Избавитель мира.

И храма святаго: И тропарь святаго, аще есть, таже кондак храма. Слава: кондак святаго.

И ныне: кондак праздника, глас 6-й:

Еже о нас исполнив смотрение, * и яже на земли соединив Небесным, * Вознеслся еси во славе Христе Боже наш, * никакоже отлучаяся, но пребывая неотступный, * и вопия любящим Тя: * Аз есмь с вами, и никтоже на вы.

Прокимен, глас 7: Вознесися на небеса Боже, и по всей земли слава Твоя.

Стих: Готово сердце мое Боже, готово сердце мое: воспою и пою во славе моей.

Апостол в деяниях, зачало 42: (Деян. 19:1-8)

Во дни оны, бысть же внегда быти Аполлосу въ Коринѣѣ, Павелъ, прошедь вышнія страны, прииде во Ефесь, и обрѣтъ нѣкія ученики, рече къ нимъ: аще убо Духъ Святъ пріяли есте вѣровавше? Они же рѣша къ нему: но ниже аще Духъ Святый есть, слышахомъ. Рече же къ нимъ: во что убо креститесь? Они же рекоша: во Иоанново крещеніе. Рече же Павелъ: Иоаннъ убо крести крещеніемъ покаянія, людемъ глаголя, да во Грядущаго по немъ вѣруютъ,

сирѣчь во Христа Иисуса. Слышавше же крестившася во имя Господа Иисуса, и возложшу Павлу на ня руцѣ, прииде Духъ Святый на ня, глаголаху же языки и пророчествоваху. Бяше же всѣхъ мужей яко дванадесять. Вшедъ же въ сонмище, дерзаше, не обинуя три месяцы бесѣдуа и увѣряя, яже о Царствіи Божіи.

Аллилуиа, глас 2-й: Взыде Бог в воскликновении, Господь во гласе трубне.

Стих: Все языцы восплещите руками, воскликните Богу гласом радования.

Евангелие Иоанна, зачало 48. [Ин. 10, 27–38.]

Рече Господь Своим учеником: да не смущается сердце ваше, веруйте в Бога, и в Мя веруйте. В дому Отца Моего обители многи суть, аще ли же ни, рекл бых вам, иду уготовати место вам. И аще уготовлю место вам, паки прииду и пойму вы к Себе, да идеже есмь Аз, и вы будете, и аможе Аз иду, весте, и путь весте. Глагола Ему Фома: Господи, не вемы, камо идеши, и како можем путь водити? Глагола ему Иисус: Аз есмь путь и истина, и живот, никтоже приидет ко Отцу, токмо Мною. Аще Мя бысте знали, и Отца Моего знали бысте убо, и отселе познасте Его, и видесте Его. Глагола Ему Филипп: Господи, покажи нам Отца, и довлеет нам. Глагола ему Иисус: толико время с вами есмь, и не познал еси Мене, Филиппе? Видевый Мене виде Отца, и како ты глаголеши: покажи нам Отца? Не веруеши ли, яко Аз во Отце, и Отец во Мне есть? Глаголы, яже Аз глаголю вам, о Себе не глаголю, Отец же во Мне пребываяй, Той творит дела. Веруйте Мне, яко Аз во Отце, и Отец во Мне.

За Достойно, поем и до отдания ирмос:

Величай душе моя, Вознесиася от земли на небо, Христа Жизнодавца.

Ирмос: Тя паче ума и словесе Матерь Божию, в лето Безлетнаго неизреченно рождшую вернии единомудренно величаем.

Причастный: Взыде Бог в воскликновении, Господь во гласе трубне.
Аллилуиа [трижды]